

PAS Gagal Tadbir Kedah, Rakyat Wajar Pilih BN - Muhyiddin Bernama
16 Februari, 2013

ALOR SETAR, 16 Feb (Bernama) -- Rakyat Kedah wajar mengembalikan kuasa mentadbir negeri ini kepada Barisan Nasional (BN) berikutan kegagalan kerajaan negeri pimpinan PAS melaksanakan amanah dan tanggungjawabnya, kata Tan Sri Muhyiddin Yassin.

Timbalan Perdana Menteri berkata dasar kerajaan Kedah yang diterajui PAS tidak membantu pembangunan negeri ini menyebabkan pelaburan tidak masuk, negeri mundur dan rakyat tiada pekerjaan.

Katanya kerajaan PAS Kedah jelas tidak berkeupayaan untuk membangunkan Kedah kerana Menteri Besar Kedah (Datuk Seri Azizan Abdul Razak) sering meletakkan semua tanggungjawab yang menjadi kewajipannya kepada kerajaan pusat.

Usaha membela rakyat yang dilakukan BN sejak 55 tahun lepas jelas menunjukkan kerajaan BN sentiasa memastikan setiap lapisan rakyat tidak tertinggal dalam arus pembangunan perdana yang rancak bagi mencapai status negara maju menjelang tahun 2020, kata Muhyiddin semasa berucap melancarkan Kolaborasi 2013 Parlimen Kuala Kedah di Sekolah Kebangsaan Seri Pantai, Kuala Kedah, dekat sini, Sabtu.

Muhyiddin sedang dalam rangka lawatan kerja sehari di Kedah.

Turut hadir pada majlis itu ialah isteri beliau, Puan Sri Norainee Abdul Rahman.

"Kedah mundur jika tidak dibantu kerajaan pusat. Masalah rakyat, petani, nelayan dan semuanya, Menteri Besar kena turun dan selesaikan. Tanya MB Kedah, dia buat tidak...dia tak mampu buat," katanya dengan disambut tepukan hadirin tanda menyokong apa yang dinyatakannya.

Katanya di Selangor dan Kelantan banyak masalah lama dan baharu kerajaan pembangkang tidak mampu diselesaikan sehingga menyusahkan kehidupan rakyat.

Oleh itu, beliau berkata rakyat Kedah hendaklah mengembalikan kuasa kepada BN pada pilihan raya umum ke-13 tidak lama lagi dan tidak mengulangi kesilapan dalam pilihan raya umum 2008.

Sementara itu, beliau berkata 508,000 isi rumah di Kedah menikmati Bantuan Rakyat 1Malaysia (BR1M).

"Kerajaan pusat beri bantuan ini bagi membantu rakyat tanpa pernah bertanya parti mana mereka sokong. Tiada satupun kerajaan di dunia ini yang pemurah dan prihatin dengan rakyatnya seperti kerajaan BN," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=928401>